

四庫全書

集部

欽定四庫全書

集部

御訂全金詩增補中州集卷二十

詳校官中書臣張虎拜

主事銜臣徐以坤覆勘

總校官編修臣王燕緒

校對官編修臣勵守謙

謄錄監生臣黃嘉績

欽定四庫全書

御訂全金詩增補中州集卷二十

劉御史從益

三十三首 補二首

從益字雲卿南山翁搗之曾孫大安元年進士
拜監察御史坐與當路者辨曲直得罪去久之
起為葉縣令脩學講義聳善抑惡有古良吏之
風葉劇邑也兵興以來戶減三之一田不毛者
萬七千畝其歲入七萬石故在也雲卿請於大

農為減一萬民賴之流亡歸者二千餘家未幾
被召百姓詣臺乞留不聽入授應奉翰林文字
踰月以疾卒時年四十四葉人聞之以端午罷
酒為位而哭且立石頌德以致哀思之心焉雲
卿博學強記於經學有所得為文章長於詩五
言古詩尤其所長雷御史說雲卿在太學時年
甚少嘗有詩云黃金錯落雲間闕紅粉高低柳
外牆時輩皆推服其卒以詩得名者固已見於

此矣

雲卿詩如荒烟斜日村村晚
哀柳寒蒲岸岸秋
兩柳留寓風薰面千里相望月滿樓

子美不妨衣露肘長卿猶有賦凌雲
春雪云千層寶樓閣一片玉山川臨終云壞壁秋燈挑夢

破老梧寒雨滴愁生此類盡多不能悉載也

有蓬門先生集行於世

二子祁字京叔郁字文季俱有名於時

補歸潛志金朝兵制最弊每有征伐或邊釁動

下令僉軍州縣騷動其民家有數丁男好身手

成時盡揀取無遺號泣怨嗟闔家以為苦驅此

輩戰欲其克勝難哉貞祐初下令僉軍會一時

任子為監當者以春赴吏部調數宰執使盡揀
取號監官軍其人憤慍叫號交愬於臺省又衝
宰相鹵簿告丞相布薩齊勤大怒趣左右取弓
矢射去已而上知其不可用免之元光末備潼
關黃河又下令僉軍諸使者歷郡邑自見居官
者外無文武小大職事官皆揀之至許州前戶
部郎中侍御史劉元規年幾六十亦中選為千
戶至陳州余先子以前監察御史亦為千戶自

餘不可勝言既立部曲須依軍例以次相鈴束
物議喧然後亦罷之嗟乎以任子為兵已失體
況以朝士大夫充斯役乎當是時余以終場舉
人獲免而先子以御史不免立法之弊以至於
斯余赴試開封先子以詩送之且寄趙閒閒雷
希顏有云老作一兵吾命也芳聯八桂汝身之
厚祿故人如見問為言塵土困羈累二公覽之
一笑

補歸潛志凡作詩和韻為難古人贈答皆以不
拘韻字迨宋蘇黃凡唱和須用元韻往返數回
以出奇余先子頗留意故每與人唱和韻益狹
語益工人多稱之嘗與雷希顏元裕之論詩元
云和韻非古要為勉強先子云如能以彼韻就
我意何如亦一奇也嘗在試院與屏山諸公唱
和呂唐卿海藏齋詩每字韻往返十餘首先子
有云繡坼舊圖翻短褐朱書小字記歸舟屏山

大稱其工用事也後居淮陽與劉少宣唱和村
字韻亦往返數十首少宣以為全不覺用他人
韻也

補歸潛志聯句亦詩中難事李屏山王正之聯
句王云棘猴未窮巧穴蟻已失王人多稱之余
先子留意聯句主長葛簿時與屏山張仲傑會
飲坐中有定磁瓶因為聯句先子首唱曰定州
花磁瓶顏色天下白諸公稱之屏山則曰輕浮

妾玻璃頑鈍奴琥珀張則曰器質至堅脆膚理
還悅澤後居淮陽冀京父來過雪夜聯句先子
有云簾疎見飛英窓靜聞落屑又李欽叔來過
李子遷在座會合聯句先子有首唱曰玉立兩
謫仙鼎峙三敵國又云三強出奇兵八義乃八
克一老怯大敵三戰即三北後自大梁歸陳與
友聯句先子首云紅拋汴梁塵綠吸淮陽酒後
令葉縣中秋夜與郝坊州仲純王飛伯輩聯句

具載蓬門集中

附渾源州志劉摛至其曾孫登進士者若汲若
仲澤若侃若儼若從益從禹共八人嘗求書八
桂堂於趙閒閒曰君家豈止八桂為書叢桂窟
歸之又曰渾源城南有翠屏山金狀元劉摛及
右丞蘇保衡講學之地後人於此設書院

題蘇李合畫淵明濯足圖

天機本自足人事或相須東坡畫三昧迺與龍眠俱黃

州富丘壑餘杭渺江湖已困口嘲弄更堪手糊塗其來
本游戲所到非功夫平生斜川翁尚友千載餘可聞不
可見風標定何如笑倩李居士為予巧形模臨流想有
詩滄浪元非漁不入聲利場政恐吾足汗二公有深意
百年留此圖不著色塵相澹然如游天地初主人牢緘
滕丹青有渝此不渝

過尉氏懷阮籍

朝來國門遊暮抵蓬池宿有懷阮步兵豪氣無檢束嘯

歌陟高臺長風振林木老眼何曾青四海無一物萬古
留詩名九原銷醉骨居然方丈家惜也微瑕玉塗窮道
不窮先生安用哭

汎舟回瀾亭坐中作

昔年醉回瀾猶恨身屬官今年邂逅來身與亭俱閒洗
心亭下水照眼亭西山溪山如故人喜我復來還有酒
澆我胸有花怡我顏鞫鷹乍脫臂但覺天地寬山陰忽
回船夜闌情未闌

樂山松

樂山一何崇上有千歲松清孤月露底秀拔天地中蒲柳抱常質桃李開芳容爭如十八公笑傲冰霜風居然喜避世不肯汙秦封蟠如北海螭伏如南陽龍紛紛過者多匠石終不逢明堂幾時構喚起蒼髯翁

和淵明雜詩二首

俗士苦紛競此心本無塵功名廼外物了不關吾身吾身復何有形神假相親天地開一室日月挾兩鄰有生

即有化如晏之必晨但得酒中了亦足稱達人揮戈欲
却日小力自不量何如任天運閉門學坐忘詩書列四
隅著我於中央夏臥北窓風隆冬曝朝陽但有藜藿羹
亦足充饑腸

少為饑所驅老為病所迫人生能幾何東阡復南陌急
須沽酒來一笑舉大白浩歌草木振起舞天地窄同歡
二三子誰主復誰客浮沉大浪中畢竟歸真宅歲月去
何速老炎變新涼游子久不歸回首望大梁風埃慘如

此何處真吾鄉野菊明落日林楓染飛霜勸我一杯酒
悠然秋興長

和淵明始春懷田舍

家食自不惡菽水甘清貧學道未有得讀書亦良勤雖
勤竟何補俛首愧古人靜言閱世故來者日月新況復
抱沉疴百憂無一忻安得衛生訣益我華池津况如一
夢覺不與萬法鄰野人藉問我恐是劉遺民

和淵明飲酒韻

日入了公事援琴洗塵喧秋堂一燈明清響到夜偏彈
罷枕書臥渺然夢青山山英向我問君駕何時還家僮
忽喚覺惆悵不能言

臘日次幽居韻

世務方擾擾人生何營營不如不出門坐顧天地情泰
中有否來陰極即陽生掀髯一笑起窓外風鐸鳴看雲
偶獨立踏雪時閒行最愛朝日升負暄向南榮

歲除夕次東坡守歲韻

人生都百年誰問鬪龜蛇容顏鏡中換老醜不可遮殷
勤守此歲來歲復如何南鄰祭竈喧北里驅儼譁須臾
罷無為但聽樓鼓過明朝四十過暮景真易斜初心自
慷慨白首還蹉跎寄語少年子雖健不足誇

次韻別歲

一日復一月其來不肯遲一冬復一春既去誰能追問
歲果安在情不知津涯常於歲除夕知是相別時鄰翁
慣禮餞買酒烹鮮肥百挽不得留一別那須悲年年例

如此華髮吾何辭惟有學道心自覺老不衰

次韻餽歲

親朋餉無時鄰里歡有佐況當歲之終可以具百貨禮
意各示勤手段不妨大我貧無往還閉戶但高臥藜羹
且充腸珍味不登坐猶勝許文休衣食出馬磨自非揚
子雲載酒何人過空吟餽歲詩自歌還自和

清明即事用前韻

一度清明了一年溫風嫋嫋雨班班幾家繡幃尋芳去

何處蹇驢馱醉還宿草新墳驚世短落花流水占春閒
曉鶯啼破松窓夢缺月東南挂屋山

五月十四夜對月有感

世事易隨雲變滅人生難保月團圓淮陽旅舍三年夢
河朔風聲五月寒何處雲山端可老向來天地為誰寬
宦游脚底生荆棘蜀道而今却不難

再過郾城示伯玉知幾

三年兩度過澗陽鞍馬紅塵道路長花月不應知我老

溪山也解笑人忙朔風凜凜頻驚座夜雨蕭蕭偶對牀
他日水南營葬地愧無遺愛在桐鄉

次韻閒閒公夢歸

眉間喜色幾時黃滿貯羈愁著瘦腸萬里鄉關飛不到
十年岐路走空忙盃心蘸月松梢影鼻觀通風柏子香
最愛南山舊山色夢中相覓不相忘

題閒閒公夢歸詩後用叔通韻

學道幾人知道味謀生底物是生涯莊周枕上非真蝶

樂廣杯中亦假蛇身後功名半張紙夜來鼓吹一池蛙
夢間說夢重重夢家外忘家處處家

送儀提點西歸

自斷平生不問天拂衣歸去任吾年五侯鯖飽無多味
九老圖成又一傳回首京華瞻日遠放懷鄉社得天全
綸巾醉臥咸陽市始信人間有散仙

再賡

人定端能坐勝天刀圭有力制頽年道非出世頭頭是

丹不遺經口口傳陰魄沉迷終鬼錄陽精飛鍊即神全
三山縹緲誰能到目下身安亦是仙

次韻李公度

鉗有儲糧鬢有絲蹉跎歲晚坐書癡
輞川畫隱王摩詰
錦里詩窮杜拾遺應舉尚陪新進士
主文半是舊相知
春闈看決魚龍陣未必尖錐勝鈍錐

題無盡藏

梁斗南
所藏畫

誰開天地祕密藏今古人間用不窮
眼底搖光千丈月

耳根傳響一溪風勝游赤壁文章在高臥燕山氣象同
二老風沉渺何許後生猶可畫圖中

三弟手植瓢材且有詩予亦戲作

為愛胡盧手自栽弱條柔蔓漸縈回素花飄後初成實
碧蔭濃時可數枚試問老禪藤繳去何如游子杖挑來
早知瓠落終無用只合江湖養不才

次韻三弟贈南庵老人

一庵盤礴勝巢仙不入叢林恰是禪花圃蓮塘閒打景

粥盂齋鉢老隨緣
忘言已了八千偈
適意更揮三兩絃
邂逅我來推不去
坐分一半好風煙

次韻劉少宣

旅窓蝶夢曉驚回
默數流年祇自哀
與世迂疎甘袖手
及身强健且銜杯
桐凋翠葉看看盡
菊著黃花旋旋開
杖屨南庵訪幽事
秋光滿眼送詩來

酬李子遷

曾著朱衣侍冕旒
忽乘羸馬出皇州
青山有約攜琴往

白髮無成把鏡羞，却笑張儀誇舌在。不妨巢父有詩留，
柳湖莎徑東南夢。又見兒童迓細侯。

過洧川次侯生君澤韻

誰能孤憤效韓非，且喜玄微對鏡機。出得山來無遠志，
寄將書去有當歸。閒居已判平生了，真賞從教舉世稀。
日咀道腴深有味，更須口腹事甘肥。

聞蝨用少陵韻

唧唧不堪聞，村居更惱人。青衫傷久客，華髮念雙親。歲

暮那逢雨秋宵未向晨石心猶可轉百感本來真

除夕用少陵韻

窓送迢迢漏燈開艷艷花正愁聞過鴈久客羨棲鴉放
眼春猶好驚心日又斜一蓑江上雨歸思浩無涯

即事

臥疾劉公幹躬耕鄭子真溪山留好客天地許閒人花
醉紅沾袖松吟翠繞身撫心無所歎持此壽吾親

宋樓道中

十里羊腸路詰盤過花穿柳幾迴還馬頭忽轉青林角
綠繞人家水一灣

過武丁廟

早則為霖水則舟若人端合夢中求荆王枕上陽臺雨
版築英雄老死休

戲答侯威卿覓墨

萬松火厄化緇塵依舊徂徠雪裏春
令劑香螺夔一足

破慳分與畫眉人

宮中取張過墨燒灰去膠
以之畫眉謂之畫眉墨

北園

碧梧斜影落胡牀
白葛烏巾滿意涼
宴坐不知紅日晚
笋輿歸路麥花香

次韻答劉少宣

楊劉變體號西崑
竊笑登壇子美村
大抵俗儒無正眼
唯應後世有公言
先生杜曲今千丈
派出江西本一源
此道凌遲嗟久矣
不才安敢擅專門

樂府虛傳山抹雲
詩名浪得柳連村
九原太白有生氣

千古少陵無間言登泰山巔小天下到崑崙口知河源
如君少進可入室顧我今衰不及門

補趙秉文故葉令劉君遺愛碑吾友翰林脩撰
王君從之有言君子有惠政而無異政吏傳循吏
而不傳能吏吾嘗誦之云爾如吾葉令劉君既
有惠政又有才幹稱可不謂全乎君諱從益字
雲卿蔚之渾源人南山翁之胄也第進士任監
察御史能知無不言與當途者辨曲直以罪去

天子憐其才起為葉令下車脩學校聳善抑惡
一之日勵而教之二之日惠而安之奸吏惡少
望風革面君曰未也事有大於此者葉劇邑也
路當要衢饑入七萬餘石自擾攘之後戶減三
之一田不毛者千七百頃而賦仍舊可乎請於
大司農減二萬石賴以濟流民自歸者數千未
幾被詔百姓詣都請留不果授應奉翰林文字
踰月以疾卒遺民間之以端午罷酒樂設為位

而哭越明年使李道人來乞銘嗚呼非君之才
之美之惠曷能使民既去而挽留既歿而不忘
繼之以泣也哉乃為詞以招之命曰悼騷以慰
父老之思其詞曰皇天賦予若人兮鍾南山之
粹靈紛吾既有此淑質兮又重之以脩能擷六
藝之英華兮襲八桂之芳馨我予冠之豸如兮
胡獨罹此謫也飛予舄之鳧如兮胡遽去此邑
也蘭秀而摧兮玉貞而折也猗才之富兮胡壽

之嗇也噫嘻將騎箕尾上比列星乎抑乘白鶴
下顧遺民乎將為景星鳳凰以瑞斯世乎抑為
祥風甘雨以濟斯人乎維此葉邑君之桐鄉魂
兮歸來無去故鄉復銘其墓曰維南山翁之曾
孫以剛直聞百未一見槁死空墳二子邪既秀
而文將大其門耶噫

雷御史淵

二十九首

補四首

淵字希顏別字季默同知北京路轉運使事思

之季子崇慶二年黃裳榜進士甲科釋褐涇州
錄事徐州觀察判官召為荆王府文學兼記室
叅軍轉應奉翰林文字同知制誥兼國史院編
脩官拜監察御史以公事免用宰相侯革卿薦
除太學博士還應奉終於翰林脩撰初在東平
東平河朔重兵處也驕將悍卒倚外寇為重自
行臺以下皆務為摩撫之希顏蒞官自律者甚
嚴出入軍中偃然不為屈不數月閭巷間家有

希顏畫像雖大將亦不敢新進書生遇之嘗為
戶部高尚書所辟權遂平縣事時年少氣銳擊
豪右發奸伏一縣畏之稱為神明及以御史巡
行河南百姓相傳雷御史至豪猾望風遁去正
大庚寅倒迴谷之役希顏上書破朝臣孤注之
論引援深切灼然易見而主兵者沮之策為不
行至今以顧望為當國者之恨希顏三歲喪父
七歲養於諸兄年十四五貧無以為資乃以曹

子入國學便能自樹立如成人不二十游公卿
間太學諸人莫敢與之齒渡河後學益博文益
奇名益重為人軀幹雄偉髯張口哆顏渥丹眼
如望羊遇不平則疾惡之氣見於顏間或嚼齒
大罵不休雖痛自摧折然粹亦不能變也生平
慕田疇陳元龍之為人而人亦以古人期之故
雖以文章見稱在希顏仍為餘事耳

補歸潛志雷翰林淵字希顏應州渾源人與余

同里閉且姻家也父思西仲名進士仕至同知
北京轉運司註易行於世公幼喪父以孤童入
太學讀書晝夜不休雖貧甚不以介意從李屏
山游遂知名俄中高第調涇州錄事坐高庭玉
獻臣之獄幾死後改東平遷東阿令授徐州觀
察判官興定末召為英王府文學俄入翰林為
應奉拜監察御史言五事稱旨又彈劾不避貴
臣出巡都邑所至有威譽凡奸豪不法者立箠

殺之坐此為小人所訟罷去久之起為太學博士南京轉運司戶籍判官遷翰林修撰一夕卒年四十八公博學有雄氣為文章專法韓昌黎尤長於序事詩雜出坡谷喜新奇好收古人書畫碑刻藏於家甚富喜結交凡當塗貴要與布衣名士無不往來居京師賓客踵門未嘗去舍後進經公品題以為榮家無餘貲及待賓客豐腆甚濫官喜立名初登第攝令遂平一邑大震

嘗筇州魁吏州檄召不應罷去後凡居一職輒
震耀亦坐此仕不達然士論未嘗不壯之嘗為
文祭高公獻臣其詞高古一特傳誦工於尺牘
辭簡而甚文朋友得之輒以為珍藏發書頃刻
數十軸皆得體可愛在館與諸同年友制辭皆
擿其不及以箴之如誥商衡平叔云將迎間有
亦須風節之自持誥聶天驥元吉云讀書大可
益人宜勤講學人皆傳之初善李屏山後善馮

公叔獻後善高公獻臣最後善趙公周臣陳公
正叔早與余先子交嘗同鄉校同太學後同朝
先子歿公寄挽詩有云鄉校聯裾春誦學上庠
同榻夜論心余因請為墓誌迄今余家有公書
簡甚多也善飲啗未嘗見大醉酒間論事口吃
而甚辯出奇無窮真豪士也

補歸潛志雷翰林希顏為人作碑誌雖稱其善
德其疵短亦交見之嘗曰文章止是褒與貶初

作屏山墓誌數處有微言劉光甫讀之不能平
與宋飛卿交勸令削去今刻石猶存浮沉於酒
其性厭怠有不屑為之言余謂碑誌本以章其
人之善雖不可溢美有愧辭然當實錄其善事
使傳信後世若疵短則不當書也況非作史傳
何貶焉其子孫覽之豈得自安也

補歸潛志宣宗喜刑法政尚威嚴故南渡之在
位者多苛刻圖克坦右丞思忠好用麻椎繫人號

麻椎相公李運使特立友之號半截劍馮內翰
璧叔獻號馮劉子後雷希顏為御史至蔡州得
奸豪杖殺之五百人又號雷半千又有完顏莽
伊蘇富察約爾珠皆以酷聞

補金史希顏庶出年最幼諸兄不齒父思歿不
能安於家乃發憤入太學衣敝履穿坐榻無席
自以跣露恒兀坐讀書不迎送賓客人以為倨
其友商衡每為辨之且周卹焉

雲卿父子有宛丘之行作二詩為餞

陽春到上林百卉紛白紅岸谷稍敷腴溪光亦沖融獨
有石間柏不落鼓舞中期君如此木歲晚延清風

漢庭議論學傾耳待歆向君家賢父子千載蔚相望讀
書二十年閉戶自師匠異端絀偏雜陳言刊猥釀鋼全
百鍊餘氣出諸老上頽風正波靡去去作隄障

京叔將拜埽於陳徵言為贈老懶廢學茫無所得
獨記其與屏山雲卿襟期所在者非以為詩也

梁苑池塘生綠烟吹臺草色春芊芊故人幽局閉長眠
氣槩英英猶眼前陽春無力蘇重泉孝子感特涕泗漣
漣歸埽淮陽阡徵子贈別意拳拳我自頑鈍須人鐫
安能視後輒子鞭姬情孔意星日懸幹旋萬化中持權
斯文興喪實闕天尋常墨客技藝然醫巫星厯相比肩
何用雕琢空徂年卽今海縣謾腥羶獨挽洙泗可洗湔
乃公有志屏山賢二豪在日子牽連傷哉未售墳已顛
老我欲種南山田子之兄弟其周旋事業絕勝空言傳

同裕之欽叔分韻得莫論二字

幼安謝辟命子雲老寂寞趨嚮豈獨異時命非所度我
久困流離一屢求負郭雖無斬敵功尚舉力田爵蒿少
啓吾封四履盡伊洛有客來問津醉眼入寥廓世事久
閉眼終日只睡昏清風何處來佳客已在門倒屣往從
之玉色向我溫妻孥趣作具歡喜傾瓶盆清夜襍被往
共就遺山元嘲諢及俳語發揮間微言懸斷漏天樞高
嘯驚鄰垣脰合正相和意到俄孤鶩恨不倒困廩矧肯

留籬樊棄僑獲珠玉披榛見蘭蓀我肱已三折醉墮偶
全渾知無適俗韻量力任灌園二君清廟器巾屨華鬘
罇蒼生望休息朝廷待崇尊出處既異途會合難預論
此樂未易得此夕勿憚煩白酒舉初爵黃雞溷諸孫水
樂喧後部山鬟秀前軒一醉萬事休商聲滿乾坤

會善寺松

物生自有常怪持物之病嗟嗟此老蒼怪怪生魁柄侏
儒威髀股宿瘤擁腮頸蜿蜒蛟龍戲騰擲羆虎競鬚髯

喜張礫意氣怒狂進
匠石求棟楹節目足
譏評芻蕘急
新煇堅悍空盼瞪
靜言觀倚伏未易相
弔慶雖違時世
用顧免斤斧橫陽秋
莫榮悴歲月何究竟
盤盤曲則全
挺挺獨也正小草悞埽
迹伏神還守性儻隨
天中景廣
宇共庥暎

玉華山中同裕之分韻送欽叔得歸字

洗耳潁川水療饑
西山薇山川得佳
客草木生光輝末
路風教薄此道日
已微相期千載事
非君誰與歸

九日登少室絕頂同裕之分韻得蘿字

閒居愛重九佳人重相過登高酬節物少室鬱嵯峨
迤謝塵土夷猶出烟蘿歛如據鼇頭萬壑俯蜂窩浩浩
跨積風瀾瀾渺長河日車是紅輪天宇凝蒼波指點數
齊州始覺氛埃多我無倚天劍有淚空滂沱驚鱗盼與
渚倦翼占危柯悔不與家來結茅老巖阿歸途賸老阮
廣武意如何

月下同飛伯觀畦丁灌園得畦字

村居鄰老圃喘汗憫夏畦
輓轡健晚涼月輪轉天蹊
刻金融溝涓涓水泮溪黃
萋漸蘇息綠潤俄淒迷
生意續夜氣甘滋泱新蕙
風露觸處香河漢望中低
野人無遠謀且喜豐食鮭
雖愧下帷董稍悟養生稭
歸懷自浩然流光挹平西

濟南珍珠泉

大地萬寶藏玄冥不敢私
抉開青玉罅渾渾流珠璣
輕明疑夜光潔白真摩尼
風吹忽脫串日射俄生輝
有時

如少靳威沸却纍纍風色媚一川老蚌初未知君看一
日間巧歷所不賫遊人隨意滿不卑乾沒兒吾謂歷下
城繁華富瑰奇貪夫死專利帝意憐其癡故露連城珍
可玩不可饜若曰天壤間所遇皆汝資何必秘篋苟自
貽伊瑕疵詩成一大笑臆說量天機

讀孔北海傳

漢室風流絕建安老瞞父子力排山可憐魯國真男子
也着區區七子間

賦侯相公雲溪

相公襟度本汪洋，戲鑿陂池便渺茫。
解起晴雲作霖雨，更邀明月貯清光。
千重複嶺藏仙境，萬斛香泉釀醉鄉。
畢竟麟符拋不得，烟波空效五湖蒼。

贈陳司諫正叔

洗兵有志挽天河，補袞剛留諫諍坡。
賦出石腸還婉麗，政成鐵面却中和。
寒侵桃李淒無色，雪壓池塘慘不波。
急向樽前謀一醉，六街塵土沆人多。

濟南汎舟水底見山有感而作

南山已在風塵外更恐飛埃浣碧巔
一棹晚涼波底看浴沂面目本天然

洛陽同裕之欽叔賦

日上烟花一片紅嵩邛西峙洛川東
纔聞候騎傳青蓋又見牽羊出絳宮
事去關河不橫草秋來陵寢但飛蓬
書生不奈興亡恨斗酒聊澆磊砢胸

啓母石同裕之賦

千古崩崖一罅開，強將神怪附郊禠。
無情頑石猶胎謗，貝錦從為巷伯哀。

贈答麻信之 并序

麻弟避兵渡河徑謁裕之於嵩高黃緣一見相與之
意甚厚既留數日又將過吾景玄於女兒之陰維元
劉國士也而弟游於其間則弟之為人可知己臨行
復長歌相贈清平豐融蓋他日未易量也愛養不足
詩以誦之

五老英靈未陸沉一枝高秀出詞林
珪璋自是清朝器律呂偏諧治世音
此去文章足知己後來功用只齊心
濟時相約元劉了索我雲山深復深

雪

風定雲仍暖天圍四顧低紛紛俄攪野
浩浩欲平溪樵擔歸時重漁舟望處迷
饑鴉空繞樹若箇可安棲

宮鴉

萬樹瓊芳鎖漢宮羣鴉容與五雲中
曙光先背朝陽日

春信頻呼禁籞風青鬢巧梳攸一色秀眉學畫鬪新工
鳳樓未訝啼聲切愁滿長門信未通

洮石硯

緹囊深複有滄洲丈石春融翠欲流退筆成丘竟何益
乘時直欲礪吳鉤

馬上見桃花

三衢鞍馬苦塵腥忽見溪桃倦意醒未必施朱便麤俗
最憐滌露出娉婷城東詩老圖幽絕水上仙郎記窈冥

何似玉堂留故事賣花擔上有丹青

叔獻兄歸隱嵩山有詩見及依韻奉寄

幾百千年一敬通飄飄歸袂振孤風平生自處神明在
衰俗無從議論公韶劄向來儀彩鳳弋繒何苦慕冥鴻
他年杖屨相尋處三十六峰雲霧中

劉御史雲卿挽詞二首

氣幹參天擬萬尋聖門梁棟自堪任豸冠嶽嶽鋒稜峻
鳧鳥翩翩惠愛深可忍佳城玉埋土最哀慈幄血霑襟

傳家賴有雙珠在不爾何如慰士林

少同里閨早知音投分交情雨舊今鄉校聯裾春誦學
上庠同榻夜論心南山松柏愁霜殞北地乾坤恨日侵
不得生芻躬一奠西風吹淚滿衣襟

題黃華江皋烟樹二首

疎柳靜茅亭亭下長江路不見亭中人蕭蕭烟景暮
江山萬里眼一亭畧約之黃華未死在看取畫中詩

送李執剛致仕歸洛

漕計中興屬老成引年陳請獨崢嶸果能辨此公真勇
愛莫留之我愴情塵坐恐驚黃鵠舉烟波不負白鷗盟
洛陽去去春如錦畫日神仙看地行

梨花得紅字

雪作肌膚玉作容不將妖艷嫁東風梅魂何物三春在
桃臉真成一笑空雨細無情添寂寞

無情亦
作淚痕

月明有意

助豐融

有意助亦
云真態更

相如病渴妨文賦想像甘寒結小紅

河山形勝圖

高峯巨壑與天連
中國關防表裏全
北岸塵氛重回首
不如圖上看風烟

次裕之韻兼及玄景弟

名腸相煨半成灰
戰退紛華旆始迴
文字喜逢修月手
津梁愧乏濟川材
等閒有酒輒共醉
信口哦詩不置才
最憶平生劉子駿
紫芝可惜不偕來

愛詩李道人若愚嵩陽歸隱圖

我愛嵩前凡再暮
詩僧騷客相追隨
春葩繽紛香澗谷

夏泉噴薄清心脾
霜林置酒曳錦障
雪嶺探梅登玉螭
重陽夜宿太平頂
天雞夜半鳴喔咿
整冠東望見日出
金輪湧海光陸離
神州赤縣入指顧
風埃未靖空嗷歔
窮探極覽不知老
泉石佳處多留題
簡書驅出踏朝市
期會迫窄愁鞭笞
襟懷塵土少清夢
齒頰棘荆真白癡
叩門剝啄者誰子
道人面有熊豹姿
披圖二室忽當眼
貫珠編貝多文辭
我離山久詩筆退
摹寫豈復能清竒
再三要素不忍拒
依依但記經行時
道人愛山復愛詩

嗜好成癖未易醫
山中詩友莫相厭
遠勝薰酣聲利乾
沒兒

松庵

菴中偃臥龍
閱世鬚髯古人天
共護持半夜起風雨

過華山懷陳希夷

五季乾坤半晦冥
先生有意事澄清
鞦韆四十年來睡
開眼東方日已明

梅影

維摩丈室冷於冰
千劫蕭然無盡燈
天女散花愁不寐
夜深高髻影鬢髻

紫芝峪

仙徑玄雲覆靈芝
紫氣浮朝霞
屯錦蓋
春雨潤珠旒
蘭有香偏襲苔
無色可侔
如何采真客
辟穀費冥搜

附恒岳志紫芝峪在望仙嶺東北常產紫芝故

名金雷淵有詩

御訂全金詩增補中州集卷二十

欽定四庫全書

集部

御訂全金詩增補中州集卷二十一

詳校官中書臣張虎拜

主事銜臣徐以坤覆勘

總校官編修臣王燕緒

校對官編修臣勵守謙

謄錄監生臣黃嘉績

欽定四庫全書

御訂全金詩增補中州集卷二十一

常山周昂

一百首 補二首

昂字德卿真定人父伯祿字天錫師事玄真先

生褚承亮

承亮字茂先宣和六年擢第調易州戶曹會皇子郎君破真定拘境內進

士七十二人赴安國寺試策策目上皇不道少

主失信舉人希旨極口毀詆茂先離席揖主文

劉侍中言君父之過豈臣子所當言長揖而出

劉為之動容比榜發茂先被黜餘悉放第狀元

許必暈自號七十二賢榜帥府重其名檄茂先

以易州司戶知棗城漫一應之尋解印去年七

十終弟子諡
為玄真先生

大定初第進士仕至同知沁南軍

節度使事德卿年二十一擢第釋褐南和簿有
異政遷良鄉令八拜監察御史路宣叔以言事
被斥德卿送以詩坐謗訕停銓久之起為龍州
都軍以邊功得復召超三司判官大安軍興權
行六部員外郎德卿傳其甥王從之文法云文
章工於外而拙於內者可以驚四筵而不可以
適獨坐可以取口稱而不可以得首肯又云文

章以意為主以字語為役主強而役弱則無令
不從令人往往驕其所役至跋扈難制甚者反
役其主雖極辭語之工而豈文之正哉德卿初
有常山集喪亂後不復見從之能記三百餘首
因得傳之屏山故人外傳云德卿以孝友聞又
喜名節藹然仁義人也學術醇正文筆高雅以
杜子美韓退之為法諸儒皆師尊之既歷臺省
為人所擠竟坐詩得罪謫東海上十數年始入

翰林言事愈切出佐三司非所好從宗室承裕
軍承裕失利跳走上谷衆欲還歸德卿獨不可
城陷與其從子嗣明同死於難嗣明字晦之短
小精悍有古俠士風年未三十交游半天下識
高而志大善談論而中節作詩喜簡澹樂府尤
溫麗最長於義理之學下筆數千言初不見其
所從來試於府於禮部俱第一擢第主涑水簿
從其叔北征得還而不忍去使晦之不死文字

不及其叔而理性當過之嘗謂學不至邵康節
程伊川非儒者也其說類此而天不假年悲夫

晚望

烟抹平林水退沙碧山西畔夕陽家無人解得詩人意
只有雲邊數點鴉

香山

山林朝市兩茫然紅葉黃花自一川野水趁人如有約
長松閱世不知年千篇未暇償詩債一鉢聊從結淨緣

欲問安心心已了手書誰識是生前

有感

壯心未分逐流年衰鬢從渠衆目憐却恨詩情消滅盡
語言枯淡到中邊

冷巖行賦冷巖相公所居

冷巖賢宰相宗室永貞自號也

或為孟或為鍾人心自異山本同天清雲遠望不極小
孤宛在江流中澗之毛可筐筥山之木可斤斧唯有白
雲高崔嵬風吹不消自太古峴山何奇羊子所攀東山

何秀謝公往還今爾胡為藉甚乎人間吁嗟乎冷山

早起

覆斗臨霜閣號鐘滿夜城飛揚他日事去住此時情丈
字還留滯塵沙管送迎百年今已半凜凜畏虛生

曉望

曉樹雲重隱春城日半陰蒼茫塵土眼恍惚歲時心流
落隨南北才華閱古今柴荆生事窄寧憶二疏金

羈旅

羈旅情方慘暄寒氣尚膠谷風連遠陣原樹鬱春梢要
路嗟何及浮名久已拋百年麤飯在真欲事誅茅

早春

小雪寒仍在烟花意已深老侵長路鬢春蕩故園心幸
可追沂詠何勞費越吟微躬應自愛莫作愧千金

雪

小雪暮能繁愁雲夕便昏細燈寒出戶欹樹老當軒竹
葉舊時釀梅花何處村賦詩空入夜愁絕與誰論

雨過

雨暎高簷過山開晚日明
動雲方潰擁號水未休爭沙
岸龜鼈出荒庭鶴行草泥沾
屐齒杖策有餘清

晚步

鬱鬱孤城隘飄飄絕塞游
短衣忘遠步高興會清秋
白水深樵谷黃雲古戍樓
居人半裘毯橫管暮生愁

夜

門巷溪聲夾衣裳
夜氣蘇地清林影散
月靜桂花孤左

省詩頗詠南樓興不辜關山冰雪裏何處覓天隅

晚望

疊嶂何時出荒城落日低音書雲去北烽燧客愁西鴈
隼乘秋擊狐狸倚暮啼吟詩且排悶佳句敢攀躋

獨酌

渺渺清溪濶悠悠弱藻沈客衣臨水靜鳥影過船深暫
把魚竿坐因知靜者心滄洲高興動巢父可東尋

秋夜

高閣鐘初殷層城月未光淨空含宇大臥斗帶星長暗
覺巢烏動清聞露菊香誰家砧杵急應怯暮天涼

對月

月近天河白秋深夜氣清蛛絲時隱見兔杵正分明
斂帽中宵落孤舟幾處行清風殊未發樹穩鵲休驚

促織

促織來何處秋風暗與期苦吟人不解多恨爾如知獨
枕難安夜寒衣欲及時凌晨攬清鏡一半已成絲

溪南

小徑通沙穩清溪帶樹深岸危低白屋雲近沒青岑灑
落高秋氣飛騰志士心雲臺與麟閣莫遣二毛侵

繼人韻

高興秋方逸幽居晚見過歡交寧厭數詩好不論多五
字含風雅千篇費琢磨自知才力拙相報欲如何

送李天英下第

不須寂寞恨東歸洗眼三年看一飛試捲波瀾入毫穎

莫教歐九識劉幾

宿西藍

聞道西藍好能來定有緣
青山避喬木流水信平田
步屨迷深竹題詩惜暮烟
塵心厭翻倒一室暫安禪

北湖清明

碧水隨時酒春風著處花
歡娛萬國本富貴五侯家
金動樓頭管香迴日暮車
老夫唯欲睡兒女莫相誇

中秋夜高陽對月

端正高陽月空庭又見過清風禁睡得白髮奈愁何尚
識王良策難知織女梭金波流汨汨應為照滄池

丘家莊早發

渡馬危橋立村雞暗樹號星稀白水濶霧重黑山高外
物誰能必人生會有勞鷗鵬終變化早晚藉風濤

邊月

邊月弓初滿山城角尚孤中天看獨立永夜興誰俱未
覺風生暈空懷斗轉隅含情知白兔欲下更踟躕

侍祠太室

設燎彤庭敞懸燈玉殿深星河含爽朗城闕動陰沈祗
慄誠初薦馨香德已歆清風動雲幕有喜見神心

夜步

擊柝隣居靜開門宿鳥驚西風秋半急北斗夜深明獨
立乾坤大徐行杖履輕遙憐漢宮闕重露濕金莖

宋文貞公廟

開元四荒不動塵柱石中原有老臣襄土一丘松柏暗

長安三日荔枝新

讀陳後山詩

子美神功接混茫
人間無路可升堂
一斑管內時時見
賺得陳郎兩鬢蒼

偶書

幽陰不放終年樹
好味仍餘盡日茶
詩業未降心有種
世緣初盡眼無花

失子

白髮飄蕭老病身，幾因兒女淚沾巾。
虛談誤世王夷甫，只有情鍾語最真。

北行即事二絕句

聞道崑崙北，風塵避渥洼。
至今悲漢節，不合度流沙。
五月分衣節，三軍受甲時。
莫教麟閣將，頻發羽林兒。

邊月

驅車宿雙浦，極目耿金波。
不有中秋景，其如永夜何。
沙分疑白雪，練失想明河。
桂樹元無意，南傾獨好柯。

晨起

鼓聲隨曉角，合沓起平荒。
宿火連岡小，寒星墮水長。
鯨翻驚日動，馬食快宵涼。
白首登壇將，功名好自强。

西城道中

草路幽香不動塵，細蟬初向葉間聞。
溟濛小雨來無際，雲與青山淡不分。

醉經齋為虞鄉麻長官賦

詩書讀破自融神，不羨雲安麴米春。
黃卷至今真味在。

莫將糟粕待前人

清放齋

平生眼白嫌物俗此身誰要冠帶束
茶甌飯飽一飲足
臥聽松風仰看屋

孫資深歲寒堂

世態浮雲日夜移春蘭秋菊各爭時
此心鐵石無人會
唯有庭前栢樹知

登綿山上方

環合青峯插劍長小平如掌寄禪房危闌半出雲霄上
祕景盡收天地藏野濶羣山驚破碎雲低滄海認微茫
九華籍甚因人顯迴秀可憐天一方

謁先主廟

暗粉陳丹半在亡短垣殘日共悲涼不須古碣書綿竹
自有荒村紀葆桑塵土衣冠曾繫馬歲時歌舞亦稱觴
不應巴蜀江山麗能使英靈忘故鄉

送客

相見席不暖送行情更牽只愁人面隔不放馬蹄前塞
迴雲垂地溪平水接天山川後期濶把臂兩茫然

莫州道中

大陵河東古莫州居人小屋如蝸牛屋邊向外何所有
唯見白沙纒纒堆山丘車行沙中如倒拽風驚沙流失
前轍馬蹄半跛牛領穿三步停鞭五步歇雞聲人語無
四鄰晚風蕭蕭愁殺人人有禱沙應神遼東老兵非使
臣何必埋却雙行輪

即事二首

憂患年來坐讀書田園拋却任荒蕪
目前却得晨昏力碌碌無由似阿奴

遠目傷心千里餘凜然真覺近狼須
雲邊處處是青塚馬上人人皆白鬚
正憶荒村臨古道不堪獨樹點平蕪
誰人與話西園路梅竹而今似畫圖

感秋

秋氣入行帳愁人中夜知雞聲
與人語耿耿異常時清

晨起危坐感歎不自持義和馭飛轂往返無停期春草
如昨日已復悲離離顧謂鏡中髮爾衰安得遲結束媚
鞍馬荒山去委蛇黃花泣宵露綠野含晨曦吾事久不
諧悠悠隨所之有懷南澗約敢賦北山詩

對月

月滿秋仍早臺高夜未徂水光先淡蕩星影失踟躕玉
帳傳更急荒城擊柝孤去年雙淚眼依舊入平蕪

鵲山

西征疲短服北望慘衰顏再宿如雞舍相看獨鵲山旆
沾新雨過鳥逐暮雲還白首瞻星漢何時鼓角閒

望山中松

地險蟠根古人稀小徑消雨斂開白雪風響入青霄未
畏斧斤逼惟愁霹靂燒解鞍那避遠冷色故相招

利涉道中寄子端

行武昌望利涉高青烟低白雪岡陵瀾漫溝澮滅氤氳
冷日從東來照我清影忽作溪水臥明月凌兢羸馬歎

蝟縮詰曲微行蛇腹裂遺鞭脫鎧初不知指僵欲墮骨
欲折氈裘毛襪良可念我自無備誰從輟人家土榻借
微暖坐久清冰落鬚頰黃華臞仙怯風馭久向笙歌窟
中蟄徑須持此遠相餉一洗夜堂花酒熱

即事二首

不堪華髮半頭生老去偏添愛戀情
新得家書來報喜
舊時龜子遶牀行

一牀安置似僧居白髮忘梳動月餘
嬾性漸成愁把筆

小詩常擬倩人書

九日

不堪馬上逢佳節，況是天涯望故鄉。
高會未容陪戲馬，舊游空復憶臨湘。
癡雲黯黯方垂地，小雪霏霏欲度墻。
猶賴多情數枝菊，肯留金盞待重陽。

對月

萬里寥天月相隨，不憚勞屨添華髮。
滿曾傍黑山高影，動新瓊杵光含舊寶刀。
嫦娥應見訝，獨宿樊絳袍。

翠屏口七首

去歲翠屏下東流看湧波愁將新鬢髮還對舊關河翅
健翻秋隼峰高並晚馳草深饒虎跡夜黑欲誰過

玉帳初鳴鼓金鞍半偃弓傷心看寒水對面隔華風山
去何時斷雲來本自通不須驚異域曾在版圖中

野蔓梢駝架輕泥濺馬鞍徑斜來險石溪急上清灘羽
檄千山靜羔裘六月寒長松空夾道蕭颯不成看

旌節瞻前帳風塵識舊坡眼平青草短情亂碧山多晚

起方投筆前驅効執戈馬蹄須愛惜留渡北流河
萬里來崩豁終年氣慘悽地窮青澗斷天近玉繩低
窟黃沙北崑崙白雪西故園何處覓搔首意空迷

塞古秋風早山昏落日低積雲鴉度久荒岸馬歸齊
燈火看時出茅茨漸欲迷塵沙恨于役況乃對雞棲

地擁河山壯營關劍甲重馬牛來細路燈火出寒松
刀斗方嚴夜羔裘欲禦冬可憐天設險不入漢提封

邊俗

返闔看平野斜垣逐慢坡馬牛雖異域雞犬竟同窠木
杵春晨急糠燈照夜多淳風今已破征斂為兵戈

山家七首

秋日山田熟山家趣轉奇瓏苞銀粟綴墻蔓綠雲垂野
飯留佳客青錢付小兒主人愁喪亂數數問邊陲

蕭颯晚風涼高杠引旆長嶺雲殘宿陣陵日湛晨光已
作依劉表終須問葛疆俯身馳萬里未覺鬢毛蒼

年深師欲老秋至敵還輕但使財思義猶多死易生指

揮無險阻感激在精誠萬古麒麟閣何曾浪得名

簡易軍中事川原入望多草平鋪碧錦山遠出青螺
遠愧桃花水重臨杏子河去年闕塞意蕭颯起悲歌

赤碯蟠雙闕青山壯一門放歌遊遠目箕踞得高原地
險勞天設邊戈厭口屯廟謀新控扼萬里可雄吞

官舍暫投轄塞垣還着鞭路移新歲月心醉好山川方
丈何由到桃源恐浪傳相看不隔水遺恨惜他年

翡翠長松秀鸞觚細草斑屢經新渡水不數舊看山太

華愁登陟終南費引攀豈知圖畫景長在馬蹄間

北行二首

卸鞍休馬倦解橐罷馳鳴細雨侵衣急長郊入臥平溪
喧看水滿山黑厭雲生莫怪龍行數應知欲洗兵

比歲頻分甲今年賀息兵競誇新戰士誰識舊書生北
塞甘長別南天欲遠征二年迎復送空媿秦州城

山丹花

浪蘂誰能記山丹舊所聞卷花翻碧草低地落紅雲塞

雨沾衣久溪風入把勤莫言羌婦醜誰識漢昭君

春日即事

凍柳僵榆未改容狐裘貂帽尚宜風欲尋把酒渾無處
春在鳴鳩谷谷中

寄金山長老

庭前雙栢樹作別似晨朝書信隨溪茗音聲落海潮嶺
雲閒可翫邊月苦無慘相見愁他日風沙兩鬢凋

寄王子明

病起身仍懶眠多意尚迷筆成今夕把書似隔年題久
恨心期阻難邀物理齊燈花應解事岑寂向人低

無題

西風吹白水日暮動寒威野帳收旗盡奚兒飲馬歸梢
梢聞鳥過慘慘見雲飛夜黑多豺虎荒村定敢依

萱草

萬里黃萱好風煙接路傍迹疎雖異域心密竟中央染
練成初色移瓶得細香客愁無路遣始為看花忘

得家書

窮愁非昔境白髮有深根
淚破孤城郡書來萬里村
鴈聲寒日夜秋色老乾坤
為問遊方子何時慰倚門

書齋

夜雨書齋冷西風木葉拋
暗蛩侵壞壁低鴈落寒郊
壯志初嘗膽吾生豈繫匏
草玄雖閉戶未用客相嘲

聞蟬

冥機辭委蛻天籟發幽嘶
迴露增晨洗清風藉晚攜
暫

成千里隔還作一枝低客思饒相觸愁時故不齊

晚陰不成

落日明西極高雲暗朔方樓臺分照耀宇宙一蒼茫不
藉蛟龍便虛成燕雀忙何須遣雷怒鬱鬱繞高梁

寶氏園亭二首

雲樹春秋色風泉日夜聲過庭高幕暗吹簟轉雷驚翠
袖擎詩罷銀壺得酒傾平生耽野趣到此眼偏明

磴鑿蒼崖破池通碧澗流憩深憐洞室吟穩憶扁舟谷

口堪高隱河梁厭遠遊
卜居真此地幽寂更何求

即事二首

南苑霓旌動繚牆
天街蓮燭照修廊
斗南絳氣風吹盡
小雨濛濛濕建章

楊花顛倒入簾櫳
睡鴨香殘碧霧空
盡日尋詩尋不得
鶉鴉聲在夢魂中

代書寄大元伯

南園臘蟻記同傾
一紙書來萬里情
日夜愁心隨柳色

東風吹滿大梁城

和路宣叔梅

月底明肌祭壽陽道人呼入竹西堂安排臘味千鍾酒
消破春風萬斛香花鳥有情應見惜蛾眉傾國故難藏
西湖骨朽東坡遠又有君詩惱一場

新秋

畏日經時暑清秋一夕涼真堪近燈火不復病衣裳宋
玉悲搖落安仁愧老蒼鄙夫那及此睡美百憂忘

靳子溫款春亭

曾數花鬢傍藥闌春風不到酒杯寬
自憐白首荒三徑
桃李年年擔上看

底柱圖

鬼門幽險深百篙人門逼窄逾兩牢
舟人叫渡口流血
性命咫尺輕鴻毛開圖頓覺風雷怒
素髮飄蕭激衰腐
河來天上石不移安得此心如底柱

寒林七賢

苦寒如此欲何之
雪帽風裘意自奇
縱有清詩三百首
未應肯得党家兒

過省冤谷

嬰兒偃蹇正堪孩
換得山西老將回
往者不追來不戒
莫將家世論人材

魯直墨跡

詩健如提十萬兵
東坡真欲避時名
須知筆墨渾閒事
猶與先生抵死爭

讀柳詩

功名翕忽負初心行和騷人澤畔吟開卷未終還復掩
世間無此最悲音

憶劉及之

千株何處封君橘二頃誰家負郭田長路風塵空費日
故園書札動經年未能免俗真聊爾不為懷憂亦悄然
襟抱何人與開釋論文除得老臞仙

家園

五畝園連竹三門屋向陽氣和春浩蕩心靜日舒長花
鳥成相識琴書付兩忘陶然一罇酒誰復記羲皇

晚望

獨立孤城上闕山望不休異鄉驚絕域遠目豁清秋未
擬登樓作空歌出塞愁故園飛鳥外溪水正南流

正月大風雨

風如渤海勢凌虛寒破貂裘力尚餘不為飛廡無倚賴
也知青帝有驅除

弔張益之

當年讀書山堂中夜喜與君燈火同塵編壞簡如蠹攻
弱質鄙鈍煩磨礪新詩如洗露芒鋒逸氣欲倒浮雲驄
輕裘肥馬世上雄吾徒一飯常未充君如孔翠愁彫籠
我亦哀鴻避鳴弓孤城一別天西東幾見黃葉飛霜風
寄書無由魂夢通西望落日銜千峯他時雲雨儻相逢
猶思驚雷起池龍鬼神無賴欺天公哀哉若人竟死窮
自聞君亡阜生胸上訴九闕無路從百年過眼如轉蓬

夢時憂樂覺即空長夜漫漫何時終作詩寄哀投殯宮

別本長夜漫漫
何時終為落句

題高歡避暑宮

百步風濤捲雪霜畫檐橫壁欲翱翔只應沙苑重歸後
山水空青不解涼

樓桑廟

東市臍乾照夜脂雲龍風虎各乘時地中鼓角袁方捷
天下英雄操已知攏畝見賢誰恨晚心中得計不妨遲

亦知漢祚難恢復輕擲荊州恐未宜

附芹城小志縣山在昌平州東十五里或名宜山元混一方輿勝覽載有縣山寺金真定周昂題詩其上有云野濶羣山驚破碎雲低滄海認微茫亦警句也

黃山趙颯

三十首

補一首

颯字文孺第進士明昌末終於禮部郎中性沖澹學道有得黃山其自號也閒閒趙公云黃山

正書體兼顏蘇行草備諸家體超放又似楊凝
式當處黃魯直蘇才翁伯仲間党承旨篆陽冰
以來一人而已而以黃山配之至今人謂之党
趙有黃山集行於世涼陘云峩峩景明宮五雲
湧蓬萊山空白晝永野曠清風來放遠亭云晴
日未消千嶂雪暖風先放一川花青天低處是
平野白鳥去邊明落霞秦村道中云桃花都被
風吹却楊柳似將烟染成其餘多稱此

附趙秉文題黃山書後予嘗評黃山書當在黃
魯直蘇才翁伯仲間議者未必為然今日李欽
止來與余論合且云子美有宋初詩人氣象涪
翁圓熟若論氣韻當不相上下復觀竹溪跋公
書云得法在魯公後得趣在魯公前三十年後
當有知之者

晚宿山寺

松門明月佛前燈
庵在孤雲最上層
犬吠一山秋意靜

敲門時有夜歸僧

僊和尚坐脫

識得從來覺性圓
西歸隻履更翛然
永嘉穩步曹溪路
臨濟飽叅黃蘗禰
桶底脫時無一物
機輪轉處有三玄
火中留得一莖草
依舊光明爍大千

黃山道中

小穀城荒路屈蟠
石根寒碧漲秋灣
千章秀木黃公廟
一點飛雲白塔山
好景落誰詩句裏
寒驢馱我畫圖間

膏肓泉石真吾事莫厭乘閒數往還

郊外

迴野饒秋色高臺半夕陽
鷗眠沙渚靜鳥沒嶺雲長
薄宦違幽興浮生更異鄉
歲華成白首丘壑愈難忘

貢院中懷山中故居

歲晚西溪路誰過舊草堂
苔紋侵柱礎竹色度隣牆
白首光陰疾青山意緒長
相思老兄弟夜夜夢還鄉

貢院聞雨

燈暗風翻幔，蜚吟葉擁墻。人如秋已老，愁與夜俱長。滴
盡堦前雨，催成鏡裏霜。黃花依舊好，多病不能觴。

聚遠臺

獨上平臺上，風雲萬里來。青山一罇酒，落日未能回。

秋日感懷

歲月不相饒，秋風颯已至。蚊雷稍收聲，團扇且復置。久
雨不宜人，新涼差快意。數篇東臯詩，引我北窓睡。林泉
久隔濶，塵土作憔悴。但有適人適，何嘗事吾事。一貧既

忘懷所好無不遂世無陶靖節何人知此味

用仲謙元夕詩韻

聞道藍田輞口莊敬湖前日具飛航李膺定已回仙棹
王績無由入醉鄉薄宦繫人如坐井窮愁染鬢欲成霜
早知上界多官府只向人間作酒狂

分韻賦雪得雨字

大雪初不知開門已無路驚喜視歷日此瑞固有數池
冰凍欲合林鴉噤仍聚已成玉壺瑩尚作寶花雨造物

固多才中有無盡句大兒擬圭璧小兒比鹽絮後人例
踏襲彌復入窘步聚星號令嚴亦自警未悟誰有五色
筆繪此天地素好語覓不來更待偶然遇

和茂才韻

十年為客未還家贏得毵毵兩鬢華別後故人應念我
不來踏雪看梅花

留題西溪三絕

誰開玉鑑瀉天光占斷人間六月涼日落沙禽猶未散

也知受用藕花香

波光湛碧冷無痕
眇眇輕風起縠紋
認得朝來疎雨過
却因水底見飛雲

總道西溪畫不如
豈知造物用功夫
蟾光忽作靈犀透
表裏通明兩玉壺

九日懷尹無忌

茅屋秋蕭索
幽居盡日閑
碧雲看欲暮
遠客幾時還
書劍成何事
風塵只強顏
思君千里夢
夜夜到燕山

立秋

日月如川流去矣不復回萬物各有營榮悴更相催餘
生苦多艱壯志久摧頽念欲學還丹鬱紆殊未諧今朝
立新秋庭樹西風來舉首望天宇飛雲獨裴徊呼兒且
沽酒浩歌豁秋懷醉中得妙理逸興何悠哉

和崔深道春寒

長風忽落青林端風聲洶若江聲寒太陰盤礴亂天序
推書撲筆成長歎美人何許媚幽獨使我不見心無歡

頗聞隱居誦莊屈蓬窓坐擁塵編殘琴歌酒賦兩寂寞
懸知此興殊未闌遲君一來吐欵要舉盃放目雲天寬

西城觀水

西山秋水來天地巨野橫流浩無際長風颭浪鱗甲生
兩角斜分半山際繚堤北去接飛橋鼓輦洶洶翻驚濤
中流突兀玉山起直疑河伯驅靈鼉冷光搖蕩秋雲白
渾似夢中遊震澤隔林我欲喚漁郎孤帆忽如過鳥翼
安得酒船常拍浮四時甘味置兩頭何人與我同此樂

潁陽試覓元丹丘

盆池荷花

一泓寒碧鬢波光，雨後妖紅獨自芳。
不許纖塵汗天質，政須清吹發幽香。
洛神初試凌波襪，妃子來從礬石湯。
休笑埋盆等兒戲，要令引夢水雲鄉。

扈從車駕至荆山

海上飛來碧玉峰，瑤林琪樹更青蔥。
參差樓觀浮雲表，顛倒山光落鏡中。
侍從有臣司碧落，笑談無處不清風。

好分靈沼為膏澤乞與人間作歲豐

中秋

秋氣平分月正明
藥珠宮闕對蓬瀛
已驅急雨消殘暑
不遣微雲點太清
簾外香風飄桂子
夜深涼露滴金莖

聖朝不奏霓裳曲
四海歌謳即樂聲

史舜元嘗從文孺
學詩說道陵中秋

賞月騷光樓召文孺對御賦詩以清字為韻道陵趨至
落句大加賞與手酌金鍾以賜且字之曰文孺以此鍾
賜汝作酒直士林禁之高祖言吾不如
子房君父字呼臣下不為無故事也

題齊物堂

至人識破浮生理萬變何嘗有不同果蝶夢周周夢蝶
為風乘我我乘風得時未必全無識窮處方知却有通
畢竟欲齊齊底物世間元是一虛空

秋郊晚望

桃竹猶堪杖幽尋興頗嘉池荷能幾葉籬菊不多花地
坼成龜兆林枯出犬牙村農慶豐歲社鼓已三撾

元日

馬上逢元日東風送客愁滹池春水渡瀛海夕陽樓雪

照潘郎鬢塵侵季子裘勞生已強半更欲玷清流

過良鄉縣學

儒宮宜地僻竟日有餘清殿古碑仍在庭空草自生風
高時脫木雲重欲摧城客興已瀟灑秋堂更雨聲

和詵上人雪詩

貧巷仍飛雪空庭迴絕塵照窓疑不夜着樹忽驚春枕
冷夢魂短山明天宇新賦詩分氣象定有瀟陵人

澗上

遠徑留殘照疎林出小園山川半豺虎歲月且琴樽杜
老新雞柵龐公舊鹿門不才真忝竊人道典刑存

新涼

頗覺小眠快便知秋意真清風論世舊老圃得時新移
竹觀君子翻書訪古人可人陶靖節隨意葛天民

過蓀縣董大夫廟

漢朝元不用真儒豈信忠嘉益帝圖賈誼長沙晁錯死
不須獨恨老江都

寓居寫懷


平陸溫風雪半消
孤烟籬落隔溪橋
趁虛人去林皋靜
時有晚鴉銜墮樵

得鶯應制

駕鵝得暖下陂塘
綵騎星馳入建章
黃傘輕陰隨鳳輦
綠衣小隊出鷹坊
搏風玉爪凌霄漢
瞥目風毛墮雪霜
共喜園陵得新薦
侍臣齊捧萬年觴

補歸潛志閒閒又稱趙黃山詩云燈暗風翻幔

蛩吟葉擁墻人如秋已老愁與夜俱長滴盡階
前雨催成鏡裏霜黃花依舊好多病不能觴此
詩信佳詩也又黃山嘗於黃山道中作詩有云
好景落誰詩句裏蹇驢馱我畫圖中世號趙蹇
驢余先子翰林嘗談章宗春水放海青時黃山
在翰林扈從既得鵝索詩黃山立進之章宗稱
其工且曰此詩非宿構不能至此



御訂金詩增補中州集卷二十一

欽定四庫全書

集部

御訂全金詩增補中州集卷二十三

詳校官中書臣張虎拜

主事銜目徐以坤覆勘

總校官編修臣王燕緒

校對官編修臣勵守謙

謄錄監生臣黃嘉績

欽定四庫全書

御訂全金詩增補中州集卷二十二

諸家

朱葭州自牧

二十首

自牧字好謙棣州厭次人皇統中南遷宋端卿
榜登科大定初以同知晉寧軍事卒官有詩云
寒天展碧供飛鳥落日留紅與斷霞又云水禽
孤影白霜果半腮紅海氣升孤月巖姿起暝烟

山雪尋崖斷林烟逐樹低燈殘星在壁霜重水
漫衾句法之工類如此

病起書事

牢落衰年病轉侵醫編藥裏廢閒吟臥銷白日塵凝履
起對青銅雪滿簪霜後癡蠅看老態天邊倦鳥識歸心
維摩不出文殊去門巷蕭條翠蘚深

晨起趨省

鄰雞一鳴僕再呼三星已在東南隅霜風遶屋伺我出

布衾尚欲留須臾才疎性懶真勉強饑寒見迫誰能遁
山靈笑我真有謂能使我庾如陵乎

自鄜州歸至新市鎮時方渡險喜見桑野

閭山自天降為田洛水自瀑舒為淵山川險盡鞍馬穩
昔居椳椳今乘船三年官業無毫髮萬里裝囊更蕭瑟
歸來何以謝鄉閭細說艱難為土物

自鄜州罷任歸宿澠池道中有虎為暴

峭山之阿澠之澦行路蕭條正艱阻日落山空澗水哀

市門靜閉防饑虎前年魚休殺餉婦今歲食驢斷行旅
我來萬里逐一官安可不戒為汝脯晝持弓矢夜枕戈
靜匿兒童防笑語白額將軍莫笑人世無劉琨當畏汝
趣鄜州過湖城縣武帝望思臺在焉

寒骨千年飲恨埋餘哀空寄望思臺縱令曲沃精魂見
寧與商山羽翼來趙虜典刑何足正周公畫像可憐開
忍心本自窮兵起巫蠱焉能作禍胎

晉寧感興

莫將官况說葭蘆一味蕭條稱鄙夫老圃不禁蔬代肉
樵丁還喜炕連厨兒音半已漸秦晉鄉信無因接魯洙
三見秋風落庭樹年年歸意負蓴鱸

年節嵐州席上贈同知王子直中散

別時風雪暗龍津一夢經年復見君去國光陰雖易得
夾河形勢且平分心如征馬常嘶代身伴秋鴻却渡汾
此日一罇難惜醉新年風景舊知聞

送鄜州節判任元老罷任東歸二首

長途冰雪歲崢嶸客裏那堪送客行萬里歸心應接浙
一罇別酒且班荆春生汶水庭闈近人去雕陰幕府輕
欲仗征鴻寄消息地寒不肯過邊城

都騎駸駸指汶陽關門應識棄繻郎暮寒烟浪歸期阻
細雨簷花飲興長東帶暫為彭澤令曳裾休忤漢梁王
邊城情味君應會為說無慘與故鄉

小雨不出寧海司理廳

吏散庭空鎖碧苔冷官門戶幾曾開疎疎細雨槐花落

寂寂虛堂燕子來，多病始知窮有鬼。獨賢方覺仕無媒，故園拋擲奔馳外。剛道江山未放回。

過渾源留別田仲祥同知節使

金臺前夢杳無蹤，一阻雲山莫計重。雙鯉附書常不達，兩萍浮海偶相逢。燕南落日車分轍，代北春風酒滿鍾。明日去留牽世務，燈前談笑且從容。

劉仲規挽辭

富貴康強九十春，公歸無憾我傷神。人間秀氣還高岱。

夢裏行年屬己辰名姓空留耆舊傳衣冠不見老成人
淒涼通德門前路無復青蒲裏畫輪

訪山寺僧

踏破蒼苔叩竹扃晚晴夜院有餘清幡腰落日紅千颺
簷際遙岑翠一橫種秫公田聊卒歲栽蓮僧社擬投名
從今興熟頻來往未信齋鐘午後鳴

謝吳堡知寨安巨濟贈紙百幅

百幅溪牋遠見羞故人佳餉若為酬幸將晚節收魚網

未得良工起鳳樓
柿葉學書差足慰
芸香辟蠹會須求
揮毫不見雲煙落
愚賈操金愧暗投

清河道中暮歸

緩轡溪邊喜乍晴
夕陽流水浸孤城
川平佛塔層層見
浪穩商舟尾尾行
十里烟霞隨野步
兩崖禾黍撼秋聲
雨暘雖有豐年兆
久客都無地可耕

晚泊濟陽

江北秋陰一半晴
晚涼留與客襟清
水邊畫角孤城冷

雲底殘陽遠樹明
旅鴈為誰來
有信斷蓬如我去
無程寥寥天地誰知已
村酒悠然只獨傾

冬日擬江樓晚望

萬里長空淡落暉
歸鴉數盡下樓遲
山如駭浪高低湧
天似寒灰黯淡垂
紫塞西橫連統萬
黃河東下接汾睢
此邦形勢雄今古
只與羈人百不宜

對雪

寂寂袁安舍
柴門雀可羅
青氈無舊物
黃竹有新歌
罷

飲瓢仍棄供吟筆
旋呵殷勤掃荒逕
尚憶子猷過

郊行

緩轡尋春水一涯
最憐朝雨浥輕沙
小溪煙重偏宜柳
平野雲垂不礙花
青眼步兵元好酒
黑頭江令未還家
興長不覺歸來晚
過盡城頭陣陣鴉

和郭仲榮郡城秋望

城高野濶思何窮
人在西風一笛中
樓影不搖溪水淨
春聲相答暮山空
海天引望能供碧
霜樹禁秋更倚紅

回首客魂招不得，葦蘆歸興滿江東。

孫內翰九鼎 一首

九鼎字國鎮忻州定襄人天會六年經義第一
人在太學時遊金明作詩云片片桃花逐水流
東風吹上木蘭舟隔溪紅粉休相認年少孫郎
不姓劉弟九疇億俱有時名三人同榜登科吳
彥高贈國鎮詩云孫郎有重名談笑取公卿清
廟瑟三歎齋房芝九莖其為名流所稱道如此

吾州文派先生指授之功為多年八十餘卒

甄莊三藏真身

三藏來中土時其師授記謂當逢甄而佳歿後三百年見夢於白氏

出地

中

生自龜茲國來從大業年緣甄駐飛錫夢白出重泉鐵石亦有毀筋骸何尚全應知待彌勒萬劫庇山川

附三朝北盟會編建炎三年金人試舉人於蔚州遼人應詞賦兩河人應經義張孝純充主文忻州進士孫九鼎為魁

附金圖經金自侵遼之後所在以科舉取士遂
有瀋州榜平州榜真定榜至天會十年海內小
安下詔如契丹開闢制限以歲三月鄉府省三
試鄉中曰鄉薦府中曰府解省中曰及第程文
分兩科曰詩賦曰經義上一場殿試則詩賦加
論經義加試策榜與魁各分焉是年趙洞為詞
賦第一人孫九鼎為經義第一人並補承議郎
第二第三人承奉德郎餘不限甲次盡補承事

郎科舉由是而定

附松漠紀聞金人科舉先於諸州分縣赴試詩賦者兼論作一日經義者兼論策作三日號為鄉試悉以本縣令為試官預試之士唯雜犯者黜榜首曰鄉元亦曰解元次年春分三路類試自河以北至女真皆就燕闕西及河東就雲中河以南就汴謂之府試試詩賦論時務策經義則試五道三策一論一經義凡二人取一榜首

曰府元至秋盡集諸路舉人於燕名曰會試凡
六人取一榜首曰勅頭亦曰狀元分三甲曰上
甲中甲下甲勅頭補承德郎視中朝之承議上
甲皆賜緋七年即至奉直大夫謂之正郎第二
第三人八年或九年中甲十二年下甲十三年
不以所居官高卑皆遷大夫中下甲服綠例賜
銀帶府試差官取旨尚書省降劄知舉一人同
知二人又有彌封謄錄監門之類試闈用四柱

揭綵其上曰至公樓主文登之以觀試或有私者停官不叙仍為記過親戚不回避尤重書法凡作字有點畫偏旁微誤者皆曰雜犯先是考校畢知舉即唱名近歲上中下甲雜取十名納之國中下翰林院重考實欲私取權貴也考校時不合格者白榜其名試院欲開餘人方知中選後又置御試已會試中選者皆當至其國都不復試文只以會試榜殿廷唱第而已士人

頗以為苦多不願往則就燕徑官之御試之制
遂絕又有明經明法童子科然不擢用止於簿
尉明經止於為直省官事宰執持筆硯童子科
止有趙憲甫位至三品

附中興紀事本末金試舉人於蔚州初太原帥
張孝純因城陷降金不拜執歸中京至是以孝
純主文柄是時遼人皆用詞賦兩河人皆用經
義而孫九鼎者為第一忻州人也九鼎政和間

遊太學與洪皓同舍在舍十年始登第皓在北
方屢見之

劉修撰或

二首

或字公茂安陽人天眷二年經義第二人自號
香巖居士歷京兆總幕終於翰林修撰

秋雨得雲字

一室蕭然半掩門
簷牙懸溜喜初聞
棲鴉不動寒偎樹
過鴈無聲冷貼雲
歷耳半隨風
浙瀝舞堦仍帶葉
繽紛

隔籬為問東皋叟，麩麥前春定十分。

春陰

似雨非晴意思深，宿醒牽率泥重衾。
苦憐燕子寒相並，生怕梨花晚不禁。
薄薄簾幃欺欲透，悠悠歌管壓來沉。
南園北里狂無數，唯有芳菲識此心。

趙內翰可

三首 補二首

可字獻之高平人，貞元二年進士，仕至翰林直學士。風流有文采，詩樂府皆傳於世，號玉峯散。

人集子述字勉叔永安二年登科賦雪云奇貨
可居天種玉太平有象麥連雲屏山故人外傳
說勉叔詩章字畫皆有父風性落魄嗜酒卒以
樂死俶儻奇男子也

來遠驛雪夕

使高麗
時作

江上東風冷不禁晚雲翻手弄晴陰春來天氣不全好
夜久雪花如許深煖老正思燕地玉辟寒誰有魏臺金
空齋寂寞青綾被學得東山擁鼻吟

雲興館曉起

雙旌晚泊雲興館對面高峯絕可人
一夜山雲飛作雪
要誇千樹玉嶙峋

江路聞松風

雪裏雲山玉作屏松風入耳細泠泠
朝來醉著江亭酒
却被髯龍喚得醒

自白雲上石甕至明仙與黑道人飲

白雲下明仙巖路縈九折僧居未離人
西崦頗孤絕萬

株倚空青雙壁似天闕幽懷愜泉石高行在麴蘖道人
唱山歌擊竹為之節翩然兩朱袖雅鄭輒間發殘陽逼
歸鞍悵與清境別今宵晉溪夢蕭灑掛林樾

謁先主廟

天下英雄操與君老奸豈是一流人乘時不作池中物
得士能令鼎足均故里柔桑曾羽葆荒祠古木尚龍鱗
天教典午亡吳魏雅志嗚呼竟不伸

劉西巖汲

十一首 補二首

汲字伯深南山翁之子天德三年進士釋褐慶
州軍事判官入翰林為供奉自號西巖老人有
西巖集傳於家屏山為作序云人心不同如面
其心之聲發而為言言中理謂之文文而有節
謂之詩然則詩者文之變也豈有定體哉故三
百篇什無定章章無定句句無定字字無定音
大小長短險易輕重惟意所適雖役夫室妾悲
憤感激之語與聖賢相雜而無愧亦各言其志

也已矣何後世議論之不公耶齊梁以降病以聲律類俳優然沈宋而下裁其句讀又俚俗之甚者自謂靈均以來此秘未睹此可笑者一也李義山喜用僻事下奇字晚唐人多效之號西崑體殊無典雅渾厚之氣反詈杜少陵為村夫子此可笑者二也黃魯直天資峭拔擺出翰墨畦逕以俗為雅以故為新不犯正位如參禪著末後句為具眼江西諸君子翕然推重別為一

派高者雕鐫尖刻下者模影剝竄公言韓退之以文為詩如教坊雷大使舞又云學退之不至即一白樂天耳此可笑者三也嗟乎此說既行天下寧復有詩耶比讀劉西巖詩質而不野清而不寒簡而有理澹而有味蓋學樂天而酷似之觀其為人必傲世而自重者頗喜浮屠遽於性理之說凡一篇一詠必有深意能道退居之樂皆詩人之自得不為後世論議所奪真豪傑

之士也

題西巖

人愛名與利我愛水與山人樂紛而競我樂靜而閒所以西巖地千古無人看雖看亦不愛雖賞亦不歡欣然會予心卜築於其間有石極峭岬有泉極清寒流觴與菝楔終日堪盤桓此樂為我設信哉居之安

卜築西巖最可人青山為屋水為隣身將隱矣文何用人不知之味更真自古交游少同志到頭聲利不關身

清泉便當如澗酒澆盡胸中累劫塵

平涼道中

青山炯無塵塵滿行人衣行人望青山咫尺不得歸吾
歸不作難世故苦相違何當臨溪水一洗從前非

南園步月

雲橫樹外山樹映山巔月微風拂寒枝疎光散清樾幽
歡難相遇此景安可忽從來山水心不為塵埃沒

不如意

朝亦不如意莫亦不如意今日只如此來日復何異一
懽強欲謀百憂已先至乃知塵網苦動輒心萬計高軒
與華冕儻來亦如寄規規必欲求愈勞終不遂善哉榮
啓期自寬以遣累

慶州回過盤嶺宿義園

隨馬雨不急催人日欲晡山從林杪出路到水邊無拘
縛嗟微宦崎嶇走畏途村家應最樂雞酒夜相呼

到家

三載塵勞慮翻然盡一除園林未搖落庭菊正扶疎
遶屋看新樹開箱檢舊書依然故山色瀟灑入吾廬

高陽道中

杏花開過野桃紅榆柳中間一徑通禽鳥不呼村
鳩靜滿川烟雨淡濛濛

家僮報西巖栽植滋茂喜而成詠

孤雲出岫本無心何用微名挂士林近日故園消息好
西巖花木已成陰

留別四弟

對牀喜清夜，罇酒話平生。自是今宵雨，於人却有情。

酒中作

樹暗春將老，酒闌人欲歸。徘徊風雪夜，花絮一簾飛。

西巖歌

西巖逸人以天為衢兮，地為席。茵青山為家兮，流水為之朋。饑食芝兮，渴飲泉。又何必有肉如林兮，有酒如澠。世間清境，端為吾輩設。吾徒豈為禮法繩，少文援琴衆。

山響太白舉杯明月清波澄人間行路是處處多炎蒸
如何水前山後六月赤脚踏層冰

題蒲縣下庫村

汲嘗
今此

古柳長楸倚翠微水光嵐氣襲人衣清閒歲月無多事
事簡何妨倒載歸

附趙秉文西巖歌跋南山翁子伯深西巖歌置
之古人集中誰能辨之所謂不拘禮法非如晉
之狂士公未及五紀致政臨終不亂蓋有道者

公又有詩云身將隱矣文何用人不知之味更
真尤可諷也

劉內翰瞻

三首

瞻字巖老亳州人天德三年南榜登科大定初
召為史館編修卒官党承旨世傑鄺著作元與
魏內翰飛卿皆嘗從之學巖老自號櫻寧居士
有集行於世作詩工於野逸如厨香炊豆角井
臭落椿花之類為多

春郊

桑芽粒粒破春青
小葉迎風未展成
寒食歸寧紅袖女
外家紙上看蠶生

無極道中

銀河淡淡瀉秋光
缺月梢梢挂晚涼
馬上西風吹夢斷
隔林烟火路蒼茫

所見

傾欹石片插漣漪
上有蕭蕭楊柳枝
藻荇半浮苔半濕

浣沙人去不多時

郝內翰俱

二十一首

附一首

俱字子玉太原人正隆二年進士仕至河東北
路轉運使子居簡字仲寬進士不第有詩名太
原平陽間居中字仲純樞密院令史出身嘗刺
坊州人物楚楚所謂文獻不足猶超人羣者也
正大末除鳳翔治中南山安撫使詩亦有功子
玉自號虛舟居士有集行於世如云勞生雖可

厭清景亦自適殊有古意也

郝吉甫蝸室

草草生涯付短椽身隨到處即安然功名角上無多地
風月壺中自一天世路久諳甘縮首麴車才值便流涎
一生笑我林鳩拙辛苦營巢二十年

聽雪軒

扶疎窓外竹歲暮亦可愛蕭散軒中人高節凜相對清
寒入夢境風雨號萬籟覺來聞雪落浙漉珠璣碎饑腸

出佳句疊疊入三昧華堂沸絲竹此樂付兒輩

魏處士野故莊

郊原冷落霜風後桑柘蕭條兵火餘試問當時卿與相
幾家猶有舊田廬

七月十五日夜顯仁寺東軒對月

野迴雲歸盡山高月上遲暗蟲依露草驚鵲遶風枝素
影隨波遠新涼與酒宜中秋更有味試為卜歸期

應制狀元紅

仙苑奇葩別曉叢
緋衣香拂御爐風
巧移傾國無雙艷
應費司花第一功
天上異恩深雨露
人間凡卉漫鉛紅
情知不逐春歸去
常在君王顧盼中

疊翠柳

畫樓西畔石州山
指點雲烟識翠鬟
回首十年真一夢
淡天如水夕陽間

題均福堂三首

憧憧車馬競春遊
不見溪堂五月秋
臥聽雲濤春午枕

夢隨鷗鳥落沙洲

為魚為鳥知誰是
看水看山俱得意
存亡貴賤聽天公
只有歸休須早計

歸休得計即歸來
林下空言只可咍
莫待山靈嫌俗駕
却將鞍馬覓塵埃

次仁甫韻

渺渺橫烟渚
淒淒挂月村
酒非隣舍取
詩復故人論
世態烏棲屋
生涯雀在門
西山却多思
松雪動吟魂

題溫容村寺壁

草樹醒朝雨，烏鳶快晚晴。
山光自明潤，野氣亦淒清。
茗椀閒中味，紋楸靜裏聲。
此懷能自適，未要縛簪纓。

故城道中同元東巖賦

客亭南北厭飄零，尚喜揚鑣過故城。
桐葉不堪追往事，泥丸猶足見民情。
青山閱世幾興廢，白塔向人如送迎。
佇立夕陽無限思，西風禾黍動秋聲。

晚過壽寧

稻壟分棋局松門入畫圖牛羊歸自急鷗鷺宿相呼落
日低青嶂高風起暝途歸僧上烟靄回首愧區區

子文致君九日用安字韻聊亦同賦

旅食京華秋又殘舊遊真似夢槐安閒居浪說重陽好
塵世端知一笑難黃菊已堪增悵恨白衣無復慰荒寒
馬頭明月應相笑依舊紅塵滿客鞍

題孔氏園亭

嚴勝諸孫賢至今相承種德滿家林綠槐丹杏風流遠

翠竹蒼松歲月深，傾蓋昔誰陪。
俊賞過庭今復嗣，徽音
此生夙有東游願，杖屨他時或可尋。

攬秀軒

寺得新游處，軒餘舊賦詩。
山川蒲子國，松柏晉侯祠。
行止非人力，登臨且歲時。
道人應笑我真負鹿門期。

上巳前後數日皆大雪新晴游臨漪亭上

十日陰風料峭寒，試從花柳問平安。
野亭寂歷春將晚，山徑縈紆雪未乾。
足踏東流方縱酒，手遮西日悔投竿。

淵明正草歸來賦莫作山中令尹看

奉陪太守游南湖同郭令賦

翠幄千章蔭晚空年華心賞兩無窮雲頭欲落催詩雨
池面微生解愠風經筭使君談似綺仙舟令尹飲如虹
娥隅自適清池樂不信參軍是郝隆

三月望日次邊德舉攬秀軒

水遶千家邑山圍一席天桑麻新雨露檜栢老風烟夢
後餘芳草愁時更杜鵑亦知推不去端用得忘年

新秋

旅食京華困鬱蒸，可人秋意及新晴。
夜窓便覺風千里，曉鏡從添雪數莖。
蟬噪不離羈客耳，燕歸還動故園情。
軟紅塵外西山色，乞與閒人眼暫明。

寺樓晴望

詰曲闌干面翠微，蔥蘢窓戶溢清暉。
雨侵斜日明邊過，雲望山前缺處歸。
多病過春猶止酒，薄寒向晚却添衣。
宦名不負滄波願，羞見陂田白鳥飛。

題五丈原武侯廟一首

仲純

籌筆無功事可哀
長星飛墮蜀山推
三分豈是平生志
十倍寧論蓋世才
壞壁丹青仍白羽
斷碑文字只蒼苔
夜深老木風聲惡
尚想褒斜萬馬來

御訂全金詩增補中州集卷二十二